

REGIONAL NEWS

HEADLINES:-

1. Kawlphetha megawatt 24 pechhuak thei Tuirini Small Hydel Project siamna tur lungphum vawiin khan Chief Minister Pu Lalduhoman a phum.
2. Chief Minister Pu Lalduhoman sorkar kal tawhte siam chhuah lêt aia tam ZPM sorkarin kawlphehtha siam chhuah an tum tih a sawi.
3. United Arab Emirates President Sheikh Mohamed bin Zayed Al Nahyan chuan vawiin khan Prime Minister Narendra Modia sawmna angin India a lo tlawh
4. Spain-a rel tlan chak chi pahnih insu avangin mi 39 an thi.

<><><>

TUIRINI SHP FOUNDATION

Kawlphetha megawatt 24 pechhuak thei Tuirini Small Hydel Project (SHP) siamna tur lungphum vawiin khan Chief Minister Pu Lalduhoman a phum.

Sesawng ram chung Tuirini kama din tur he Project atan hian New Development Bank (NDB) aţangin loan cheng vbc 676 point 98 puk a ni ang.

New Development Bank duh danin Mizoram sorkar chuan Tuirini SHP enkawltu tur bik Project Monitoring Unit a din fel tawh a; Project Management Consultant rawihna tur tender pawh nikum December thla khan tihchhuah a ni.

Tuirini Project hi kawlphehtha megawatt 24 pe chhuak thei tura ruahman a ni a, kum khatah kawlphehtha unit maktaduai 64.1 a siam chhuak thei dawn a ni.

<><><>

CM

Chief Minister Pu Lalduhoman Union Territory a nih atanga kum 54 chungin Mizoramin ama pualin kawlphehtha megawatt 10 vel bak siam chhuah a la neih loh thu leh sorkar kal tawhte siam chhuah lêt aia tam ZPM sorkarin kawlphehtha siam chhuah an tum thu a sawi.

Tuirini Small Hydel Project atan Congress sorkar lai kum 2016-ah hmalak tan a nih thu sawiin Pu Lalduhoma chuan, a bul tanna tur US dollar nuai 3 kha MNF sorkarin dawng ngam loin an reh ta vang vang a, ZPM-in Mizoram mamawhna hriaiin an thar thawh leh tâ a ti a, he project hi kum 5 chhunga thawh zawh hman an tum tih a sawi a ni.

Chief Minister chuan ram hmasawn ni turin kawlphehtha mamawhna a san thu leh ZPM sorkar chuan Industrial Investment Policy an siam thu sawiin, he policy hmanga Mizorama invenstment rawn ti tur company-te hnenah thil tiam pali - a thlawna ram pek te, kawng siam sak te, tui connection pekte leh power connection pek a nih thu a sawi a; company lianten Mizoram an rawn ngaihven thu a sawi bakah, Mizorama entrepreneur-te thil siam chhuahte chu kawlphehtha mamawh an nih deuh zel thu a sawi bawk a ni.

Tuirini Small Hydel Project atan hian Sesawng rama Tuirini lui chu khuah a ni dawn a; Externally Aided Project hnuaia mi niin, sum ruahman hi cheng vbc 676 leh nuai 98 a ni a, zaa 80 chu sorkar laipua

Department of Economic Affairs (DEA)-in New Development Bank, Shanghai atanga loan lain a tum ang. Mizoram sorkar chuan sum ruahman zawng zawng atanga zaa 20 cheng vbc 135 a tum ve a ngai dawn a, hetihual hian Mizoramin a tum tur atanga cheng vbc 54 bak zawng hi central sorkarin a peksak dawn bawka ni.

<><><>

ADVISER TO CM

Adviser to Chief Minister Pu TBC Lalvenchhunga'n Lengpui Ram Indian Air Force hnena Hralhna cheng vaibelchhe 187 leh nuai 90 chu sorkar hmasa huna the fel leh tihfel vek tawh a ni a ti a, an sawrkar hnuah sawrkar laipui atanga zangnadawmna pawisa lokal chu an pe chhuak mai tih a sawi.

Wawiina ZPM chhung inkhawmah he thu hi sawiin Pu TBC Lalvenchhunga chuan tualchhung chanchinbua senior journalist Pu HC Vanlalruata thu ziah, 'Lengpui Ram IAF Hnena Hralh' tih a lo lang zangnadawmna cheng vaibelchhe 187.90 dawn chungchang chu sorkar hmasa huna tihfel vek a ni a ti a, zangnadawmna pawisa chu sawrkar laipui atanga lokal an sawrkar hnuah pekchhuah ani a ti a, IAF ram lei leh hralh chu Lengpui ram chauh ni lovin Sihphir ram acre 5 a tel tih a sawi bawka.

Pu TBC Lalvenchhunga chuan sorkar hnen thleng loa ram hralh theihna DC 'level'-a a zo vek thei chu mak a tih thu a sawi a, IAF ram lei chu DC 'level'-ah a tawp vek tih sawiin cheng vaibelchhe 187.90 in hralh ani a ti bawka.

<><><>

HANDHOLDING SCHEME

Mizoram sorkarin hmasawmna leh intodelh tum te puihna atana a duan Bana Kaih (Handholding) Scheme thawh hnihna hnuaiiah loan component progress partner atana dilna 386 pawm a ni tawh a; Phase-I hnuaiiah progress partner atana thlan mi 349 hnenah bank-ten loan an pe tawh.

Bana Kaih Scheme hnuaiiah loan dilna lut hi a kaihhnawih sorkar department-te'n an endik hnuah implementing department-te'n recommend list an thehluh atanga a felfai leh pek tlak ho chu Handholding scheme-a thuneitu sang ber Apex Body-in ngaihtuahin a pawmpui thin a; Apex Body-in a pawmte hi bank-te hnenah an pawmpui tura thehluh leh thin niin, bank-te hian dilna an pawmte hnenah loan an pe chhuak thin a ni.

Mizoram State Policy Coordination Committee (MSPCC) hotute hnen atanga Akashvani News Aizawl thudawn danin, Bana Kaih Scheme thawh 2-na kalpui mekah hian loan component hnuaiiah progress partner ni tura dilna lut zinga 386 pawm a ni tawh a; Phase-II loan component-ah hian Bana Kaih hnuaiiah sorkarin a thawhpui bank-ten mi 7 hnenah loan an pe tawh a ni.

Bana Kaih Scheme Phase-II loan component hnuaiiah loan pek tura dilna pawm tawhte hi Commerce & Industries department hnuaiiah 219 niin a tam ber a; AH&Vety department hnuaiiah dilna pawm tawh 81-in a dawt a ni. Mizoram KVI Board hnuaiiah dilna 35, Cooperation department hnuaiiah 20, Land Resources Soil & Water Conservation department hnuaiiah 10, Agriculture & Farmers Welfare department hnuaiiah 6, Fisheries department hnuaiiah 5, Horticulture department hnuaiiah 3, UD&PA leh Tourism department hnuaiiah 2 ve ve, Sports & Youth

Services department, Information & Communication Technology department leh Science & Technology hnuaiah dilna 1 theuh pawm a ni tawh bawk.

Handholding Scheme Phase-I hnuaia loan component-ah khan Bana Kaih hnuaia sorkarin a thawhpui bank 3-ten mi 349 hnenah loan an pe tawh a; Mizoram Rural Bank-in loan pe tam tawh berin mi 232 hnenah an pe tawh a, State Bank of India-in mi 78 leh Mizoram Cooperative Apex Bank-in mi 39 hnenah an pe tawh bawk a ni.

Mizoram State Policy Coordination Committee-in a tihchhuah 'Progress Partner-te Puitu' tih lehkhawba tarlan danin, progress partner-in loan a lakna atana project a siam chu cheng nuai 50 aia tam lo a nih a, bahlah loa thla tin a rulh bawk chuan Mizoram sorkarin an bana kaih nan an loan pung zawng zawng chu kum chanve (thla 6) danah an mimal bank account pangngaih a rul lét thin dawn a; hemi tur hian progress partner-te chuan loan an lak chu bank kalphung angin a pung zawng zawng nen an rulh phawt a ngai thung a ni.

<><><>

MYC

Mizoram Youth Commission (MYC) kaltlanga rampum Leikhabu Chhian inelna (Reading Decathlon) a tel School pahnih - Mt Carmel, Chaltlang leh La Montessori, Mission Veng chu 2-na leh 3-na a ni.

He inelna hi Food4Thought Organisation leh Monocept te tangkawpin an buatsaih a ni a, National level ah hian School 10 an qualify a ni 17 inriini khan Hyderabad ah neih a ni.

He National level hi Mizoram aiawh te hian flight cancel vangin a hmun ah an tel theilo a, Organiser ten online a tel an phalsak a, MYC office atangin national level competition ah hian an tel ta a ni.

Zing dar 8 atanga neih tan niin tlai 5:30 ah zawhfel a ni. He inelna ah hian avaiin leikhabu 100 chuang hret hmanga inel a ni a, Mizoram aiawh School Mt Carmel atanga tel pahnih- Krista Roluahpuia Khiangte Pawl 9 zirlai leh Rebek Malsawmzuali Pawl 7 zirlai te chu pahnihna dinhmun an hauh a, La Montessori atanga tel pahnih - Malsawmhlui Pachuau pawl 8 zirlai leh Joshua Lalawmpuia Pawl 8 zirlai te chuan pathumna dinhmun an hauh bawk a ni.

Mizoram Youth Commission chuan rampum inelna- leikhabu chhian inelna hautak zet mai a Mizoram aiawh school pahnih te a lawmpui hle a, an thawhrimna leh inpekna ropui a tiin hei hian Mizo thalaite ah nghawng tha a neih ngei a beisei a ti a ni.

He Reading Decathlon hi kumtin buatsaih thin a ni dawn a, inelna neih a nih leh dawnah school tam zawk an tel theihna hriattirna zauzawkin MYC chuan ati chhuak zel thin dawn tih a sawi bawk.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhian theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

UAE

United Arab Emirates President Sheikh Mohamed bin Zayed Al Nahyan chuan vawiin tlai khan Prime Minister Narendra Modia sawmna angin India a lo tlawh a. India leh UAE thawhdunna hrang hrangte hruaitu pahih hian an sawidun dawn a. An chhehvel ram leh khawvel hmun danga thil thleng pawimawhte an sawidun bawk ang. Tun tum hi Sheikh Mohamed an India a lo tlawh vawi thumna a ni a. India leh UAE te hian sumdawnna, sum peipunna, ram venhimna leh energy lama thawhdunna ti lian tura hma an lak dun lai mek a ni.

<><><>

SPAIN

Spain-a rel tlan chak chi pahnih insu avangin mi 39 an thi. Thudawn danin nizan khan Spain chhim lamah Adamuz khaw bulah chetsualna hi a thleng a. Rel tlan lai pakhat chuan a kawng zawh sualin a bula relkawng a a dai a. Hemi hnu hian lehlam atanga lo tlan ve rel nen an insu zui ta a ni. Mi 73 in hliam na tak an tuar a. Chhanchhuah hna hi ngawrh takin thawh zui nghal a ni.

<><><>